


龍湖叢稿

卷下



龍湖叢稿目錄卷下

傳狀類

義丐王某傳

趙母楊宜人傳略

先考府君行狀

子珍嚴公家傳

聘三尹君行狀

碑誌類

李母楊太孺人墓誌銘

張蓋臣公墓表

張耀廷

公墓表

張迪臣君墓誌銘

趙綏之公墓誌銘代

李毓芳君墓表

楊母羊孺人墓表

趙母周太

孺人墓表

李母趙太宜人墓誌銘

蘇齋胡君墓

誌銘 尹礪金先生墓表 賓川趙敬齋先生墓表

楊克舉先生墓表 楊母陽太孺人墓表 蘇母

趙太宜人墓表 楊母陽太夫人墓表 楊母陽太

孺人墓表 慈潤禪師塔誌銘

雜記類

絕癸卯臨安之變 遊南湖記 新建蒼逸圖書館

記 重建下關子河橋碑記 新建喜洲女子兩級

小學校記 暮春旅行歸化寺記 秋日旅行記

讀史札記十四則

箴銘類

校訓八則

贊頌類

趙建中先生像贊

趙華生先生像贊代

楊利溥

先生遺像贊

董鼎九先生像贊

李節母趙太宜

人像贊

楊母李太夫人遺像贊

哀祭類

祭劉君益齋文

祭楊克舉先生文

祭李君友三

文公祭嚴子珍先生文

祭尹聘三先生文

哭

亡兒文

附駢體文

賓川朱孔彰先生六十壽序代

王太孺人七十壽

序 蒼逸圖書館落成紀念公啟

楊順舉先生墓

表 祭龍母李夫人文代

凡四十九篇

龍湖叢稿目錄卷下終

龍湖叢稿卷下

大理冠三趙甲南

義丐王某傳

王某佚其名史城人亦士族也家故貧性倔强不事生業以此益困一日苦飢甚無已姑行乞居民數百戶非所悅弗向之乞與以米始受與以錢則卻之詞色稍厲即掉臂去不復踵其門日偃仰斗室中塊然獨處人罕見其面偶遊市小兒侮之但怒以目而已有田一畝其先世所遺或勸之售不可已而疾作語

族人曰此田與吾寡嫂勿售我死藁葬可矣遂卒鄉人高其義因稱之為義丐云

趙母楊宜人傳略

趙司馬正之配楊宜人卒於家司馬悼之不忍沒其德為述其略命余為之傳余不文曷足以傳宜人辭至再弗許遂拜而受之案宜人氏楊同里戊午舉人原任河南汝州直隸州州同上飛公孫女邑庠生莫宇公長女邑庠生毓俊公胞姊也宜人生而秀慧未十歲即嫻女規及笄歸趙氏婉婉承順得舅姑歡時

家貧司馬商於外宜人晝夜勤苦操作以佐甘旨又和妯娌使始終無間言故司馬遠遊而無憂者惟宜人是賴泊丙辰變作倉皇出犇之劍之麗無一日離舅姑側雖風鶴頻驚而奉養無缺人皆稱之壬申榆郡恢復偕舅姑及夫旋里二年司馬實遷壚地舉家事精麤劇易壹委宜人丙寅舅卒哀甚幸有司馬諸弟弟營治其喪心少釋轉念夫未及知又不禁泫然泣下既見姑則婉言慰姑恐姑知其悲因益悲不能慰姑即不能慰夫其孝順若此至辛未司馬自壚返

麗遂隨姑詣麗補紉澣濯饔饍朝夕無怨色語人曰
吾嘗得事姑與夫願已足矣勞云乎哉是時戎務未
息楊武愍公藉通商以裕餉以司馬兄綬之主之宜
人念兄獨力難支勸夫襄其事而以事姑自任姑老
且疾飲食必親進醫藥必親嘗如是者有年癸酉太
宜人棄養手具含殮哭失聲甲戌扶櫬歸葬尋夫兄
相繼歿宜人視羣從子女寒則衣之飢則食之羣從
或忘其母而母宜人宜人亦忘其非己出計自適趙
以來為夫弟喪者一為姪喪者四為姪婚者三凡嫻

族有以急告者無不周之以是為里黨所欽嗟乎軍興之後婦道不修士大夫家鮮克由禮聞宜人之德亦可以少媿矣宜人相夫四十餘載敬克厥愛無片言稍逆惜余生已晚不及見宜人之事舅姑若何而聞之里人甚詳至若待娣姒則見其雍雍也教子女則見其肅肅也大而男女嫁娶又見其從宜從俗也小而庭除灑埽又見其不厭不倦也蓋余所見賢母勤而儉寬而仁未有如宜人者去歲猶強起視事勾當一切方擬由耆而老而耄而期頤而乃以今年春

卒豈不悲哉宜人生於道光乙未年八月八日壽六十有二子二長永清邑廩生先宜人一年卒次懋清棄儒服賈善承親志孫二曰梓曰桐女二咸適名門孫女一羣從子女亦皆嶷嶷成立其造福於似續者正未有艾也爰不揣而為之傳以詒來者

先考府君行狀

府君氏趙諱景溫字子和又字愛堂吾趙氏先居江南鳳陽縣嗣有諱鐸者遊幕入滇至大理之喜洲悅其山水遂家焉自明迄今世習詩書如運副廷重

公刺史仰山公太守秀峰公事蹟備載通志府志歷
十餘傳至曾大父華峰公佐兄秀峰公治陝廿年凡
救荒濬河築城諸要政籌畫甚周陝人德之謳思不
忘華峰公有子三長諱德昌郡庠生次諱錫昌清咸
豐辛亥舉人官保山教諭工制舉文與楊竹溪同時
齊名黃槩卿侍郎主講五華書院每試輒冠同儕其
文載五華課藝季即先大父諱福昌公丁變亂因絕
意進取以讀書飲酒自娛鄉里稱為隱君子生府君
與叔父景琴府君為祖妣氏張出叔父為繼祖妣氏

董出時家貧命叔父業商而府君業儒府君幼聰穎
嘗從斂之景西兩先生學斂之先生諱禧昌為府君
從父擅博雅名景西先生諱華品為府君族父重氣
節均載縣志文學卓行中府君之好學不倦立品不
苟皆兩先生教誨之力也當咸豐丙辰前吾家藏書
極富及亂作家人俱走避散失殆盡府君獨潛往檢
殘帙晝伏小樓讀之夜則懷以出是時家業蕩然不
能舉火府君不得已貸貲戚友販布鄰邑聊以自給
往返數十里徒步烈日中流汗浹衣迄無愠色然性

嗜學日坐市上猶手不釋卷人與之市往往弗顧以
是無過問者未數月折閱無遺先大父仍命從斂之
先生學同學數十人惟府君領悟捷甚斂之先生因
謂先大父曰此子可教其母令廢學府君乃益發憤
篝燈讀每夜分不輟同治壬申亂平汪荅洲學使按
臨府君赴試鶴陽補博士弟子員尋補廩膳生光緒
乙亥恩闈登賢書然公車六上屢薦不售知者咸為
惋惜辛巳以還課徒郡城垂十數年知名士多出其
門王方伯人文其尤著者也郡屬敷文書院主講者

再成就亦衆己丑大挑二等乙未選授易門縣教諭
易邑文風陵替久矣六十餘年無膺選拔者府君蒞
任見吳生貞祥深器之誘掖獎進吳生學愈力丁酉
果袞然居首選文風遂為大振甲辰陳筱圃太史聘
充高等學堂歷史教習旋調補雲州學正州人士又
以高等小學堂國文教習堅請擔任府君靡不殷殷
講授諸生頗受其益已而以先繼祖妣哀病辭職歸
里宣統間自治成立設議事會舉府君為副議長吾
邑議事城鄉各以利害相反恒多爭執府君一持以

平故能和衷辦理自袁氏下令取消後遂不復與聞
地方事有顯者來亦謝不見蓋性耽恬淡不喜與要
人往還也晚歲家居日惟以經史課孫輩或瀏覽報
章故人至為置酒酣飲縱論時政得失識者以為知
言地方事關繫重大者如學校水利諸端力與維持
至一切請託屏絕若凜其立品不苟可見矣府君年
屆古稀每夕觀書至漏二下偶有所作寄慨甚深不
孝侍讀日久時以敦品勵學為言而自立無狀碌碌
未有建樹今冬忝廁省會開議伊始遽聞病耗星夜

馳回竟先數日棄養嗚呼痛哉府君性中和易田夫野
老皆樂與之遊然嫉惡則所親亦不稍假借其於家
也事親以敬待弟以誠持躬以儉教子以嚴不孝行
年五十猶寄書切責如少時令則欲聞訓示而無從
矣嗚呼痛哉

子珍嚴公家傳

公諱鎮圭字子珍晚號蒼逸老人姓嚴氏始祖福公
為武略將軍千戶侯明洪武間從征至滇卜居大理
喜洲遂為大理人累世簪纓閱十餘傳至承園公武